

«Memia bleras iniziativas donnagiusas»

Partida liberaldemocratica grischuna

DA GION NUTEGN STGIER / ANR

■ **Ella è cunter iniziativas e vul betg entrar en l'UE, persuenter è ella per las cunvegns bilaterals e per reducir las leschas. Quai che pertutga la politica da migraziun vegnia debattà cun blera nunvardad. Tut quai ha ditg marde saira Petra Gössi, la nova presidenta da la pld svizra a Cuira.** En uffizi sco presidenta naziunala da la Partida liberaldemocratica svizra (pld) è la cussegliera naziunala dal chantun Sviz dapi in mais. La dunna da 40 onns è daventada il mez d'avrigl a Berna successura da *Philipp Müller* ch'è sa retratg sco president svizzer dals liberals. Ella saja vegnida cun plashair a Cuira, ha menziunà Gössi a l'entschatta da ses referat. Radund 100 persunas èn suandadas l'invitaziun da la pld grischuna a la saira da partida cun il tema central: liberalissem.

Savens vegnia be fatg tema

Il success da la Svizra sco er dal Grischun sajan l'industria vitala, l'innovaziun e lura er la libertad. En strusch in auter pajais sajan las aspectativas da vita uschè grondas e grazia a nossa buna scolaziun e furmaziun saja er pussaivel da viver sin quel nivel. «A l'economia svizra va i bain e gist per il martgà naziunal èn las cunvegns bilaterals d'impurtanza vitala», ha ditg Gössi. Ella deploreschia fitg che da preschent vegnia debattà tar la politica da migraziun cun savens far tema e cunzunt cun aspects nunvardaivels. La presidenta da la pld svizra ha punctuà che d'entrar en l'Uniun europeica saja per la pld er en l'avegnir strusch in tema, den-

tant la via bilaterala per promover e sviluppar il commerzi naziunal, quella saja indispensabla. Gist concernent la politica externa exista en Svizra memia pauc interess politic e qua haja noss pajais da prender suenter bler tenor Gössi.

Damain iniziativas

Per avair vinavant success economic saja da reducir urgent las regulaziuns, las prescripziuns e diminuir l'intschertezza giuridica, ha punctuà Gössi. Las interpretas e lur patruns sajan innovativs, dentant manchian savens las cundiziuns da basa ed er la libertad per ir la dretga via. Da centralisar tut e da decider be a Berna co e cum vinavant cun la Svizra saja er betg adina la meglra via, ha menziunà la dunna dal chantun Sviz. Da reducir sajan er las iniziativas donnagiusas e radicalas da la dretga e da la sanestra che retardian adina puspè investiziuns ed innovaziuns. Ultra da quai disfetschian ellas er il mund da lavur che funcziuna en Svizra sco strusch en auters pajais.

Politica reala e na populistica

Patruns ed investurs sajan prontos da surpigliar responsabladad e d'agir, però per quai manchia savens lur libertad. En singulas decisiuns politicas saja meglia da consentir uschia che la minoritad profiteschia e na la pluralitad, ha accentuà Gössi. La pld vegnia er en il futur a far politica reala e na politica populistica per avair success. Il model svizzer da success saja in model liberal cun quels trais aspects: libertad, raschun e svilup. Gössi spera che la pld grischuna saja suenter las proximas elecziuns naziunals danova-



La presidenta da la pld svizra, Petra Gössi, flancada da cusseglier guvernativ Christian Rathgeb (a san.) e cusseglier dals chantuns Martin Schmid.

FOTO G. N. STGIER

main represchentada en il cussegl naziunal ed ella vegnia a s'engaschar ferm per quai.

Diversas valurs impurtantas

A Berna vegnia fatg politica en las fracziuns, ils presidents da las partidas hajan bain ina tscherta influenza, però plitost

ina influenza secundaria. Tar il tema libertad ha er referì *Christian Rathgeb*, il cusseglier guvernativ e president da la regenza. La vischinanza tar la populaziun saja da gronda valur, quella experientscha haja el en il fratemp savens er fatg. Esser liberal munta però er federalissem, democratica directa, cosmopolitissem ed ordi-

naziun economica e sociala. Tar ina politica liberala dastga er na mancar: credibilitad, fidanza e constanza, ha ditg Rathgeb. Novaziuns sajan bunas ed indispensablas, dentant dovri er punts da cuntinuitad per esser solid e stabil, ha menziunà il schef dal departament da giustia, polizia e sandad.